

Otmar Oduber

El anuncia firmemente cu si nan hay'e culpabel di cualkier delito, e lo pidi su retiro. Otmar Oduber(36) ta keda den politica ya cu husticia a proba cu e no a bay cu niun suma den e caso Fondo Desaroyo Nobo San Nicolas (FDNSN). Pa prome biaha e ta laga los tur e detayenan di e caso y su pensamentonan berdadero di loke a pasa cune.

Otmar Enrique Oduber ta finaliza su estudio na 1994 y ta bin traha na su pais natal. Na Americana Hotel e ta cuminsa como un profesional den e mundo di turismo. Gobierno a mira su cualificacion y a puntr'e pa drenta den e Stichting di Bushiri cu tabata controla e operacion di e hotel y school. Poco poco el a drenta e direccion di turismo di gobierno, bou encurashamento di un otro profesional ya caba den politica Tico Croes. Politiek tabata atraemi, pero mi no tabatin niun intencion na mi edad yong di drenta politica. Un dia nan a pidimi pa bay 'cas di partido' cu urgencia. Mi a drenta 12:30 merdia pa topa Henny, Tico, Watty (q.e.p.d.) y Mike, nan a bisami cu mi tin 5 minuut pa bisa nan 'si', cu mi ta bay riba lista. Claro mi mester a bay combersa cu mi famia, ya cu mi hendenan ta sali for di un partido cu otro pensamentonan. Mi omo Dr. Dolfi Oduber tabata hasta den e tiumvirato di partido PPA. No obstante, mi a haya e apoyo di



Despues di mas cu 4 aña di persecucion

MI POR A PROBA MI INOCENCIA TUR BIAHA

dje y resto di famia cu mi tabata pidi y mi a dicidi pa acepta. Na 1997 e ta bay su prome eleccion y awendia e tin 11 aña activamente como politico; na prome instancia a hacie e candidato di hubentud, pa su edad hoben. **Tur hende ta papia di hubentud pero niun hende no ta drenta den nan pa wak kico nan kier. Mi ta aprecia e.o. loke Edwin Abath a haci. Entre otro su inicitiva pa bin cu un parlamento hubenil awor a haña un oido.**

Otmar ta bisa cu el a fiha un meta ora cu el a dicidi di drenta politica. **Bo tin cu drenta cu idealismo. Bo no por drenta politiek djis pa wak unda e ta hibabo.** Su meta ta pa sigui eleva e nivel den parlamento y den politica en general. Otro aña cu eleccion, e ta sinti cu lo tin cambio positivo. E ta compara e cambio aki cu loke Senador Mericano Barack Obama kier haci na Merca, un cambio di mentalidad y di cultura politico. **Hopi hende ta kere cu mi tin un caracter fuerte, en realidad**

mi ta un hende masha down to earth, e caracter fuerte ta conta pa e mundo politico. Na 2001 e ta bira miembro di parlamento y a constata cu e sistema cu Parlamento di Aruba tin no ta funciona. E ta sinti cu e trabou di control riba gobierno, no ta sosode dor di e falta di documento cu nan no ta haya di gobierno y e actuacion di e parlamentarionan di gobierno cu ta djis aproba tur cos sin control. **Lamentablemente nos ta pio awendia. Si bo wak e trabou cu parlamento mester haci, osea di traha, studia y aproba leyman, di controla y vigila gobierno atravez di mecanismonan existente, ta facil pa conclui cu Parlamento no ta cumpliendo cu su tareanan. E incumplimento di reglanan y seguimiento di leyman existente, pa motibo di politica partidista, ta e motibo principal pa e dis-funcionamento aki di Parlamento.**

Otmar Oduber ta sinti cu e 'turning point' den politiek tabata e encuesta

parlamentario ariba e proyecto di Race Track, cu embes di a haci wega politico cune, nan a prepara nan mes debidamente y por a hiba informacion clave cu pueblo no tabata sa.

Despues cu Gabinete Oduber 3 a sinta, nan a institui un asina yama 'Comicion di Berdad' cu mester a investiga irregularidad of fraude cu lo por a sosode den e gobierno anterior di Henny Eman. Prome Minister Nel Oduber y Minister di Husticia ta entrega keho na Ministerio Publico, basa riba e rapport ey y ta start un proceso di persecucion hudicial pa busca desaparicion di 50 milyon florin, e suma cu e gobernantenan ta menciona. E persecucion a concentra riba tres politico: Ex-Prome Minister Henny Eman, Minister di Finanzas Tico Croes y su consehero Otmar Oduber. *(Florin: na Juni 2008 Ministerio Publico a dicidi di yega na un acuerdo cu e personanan aki y ta dicidi di laga e apelacion den e caso penal cai, despues cu Juez den prome instancia ta declara Sr. Otmar Oduber, liber di tur acusacion den e caso FDNSN)* **En esencia nan tabata acusa nos di a horta, pa esaki nan no a presenta ningun prueba. Politicamente nan tabata grita 50 milyon y den nan denuncia nan ta pone cu 2.7 milyon lo a disparce. Mi no tabatin miedo pasobra mi sa cu mi no a haci nada malo. Mi a declara na inicio caba cu mi ta kere den nos sistema legal, pero despues di tempo si, mi a haya hopi duda den e obhetividad y funcionamiento di Ministerio Publico. Nan a muestra di ta keda influencia dor di politiconan.** Na Januari 2004, Otmar Oduber ta keda deteni na su cas mainta 7'or, y por bay cas despues di 14 ora di interrogacion. **Mi por a sali y grita cu ta MEP y opositornan politico a haci esaki pero mi di no, esey ta un momento pa cambio di mentalidad politico. Mi a asumi mi responsabilidad como ciudadano y parlamentario y a duna e proceso hudicial su caminda pa traha, cu a tarda 4 aña y mey. Mi a logra gana tur mi casonan, tanto civil como penal, tur beslag a keda bari di mesa dor di huez.** Otmar ta corda cada caso cu un claridad manera un hende cu a pasa den guera. E ta bisa di ta orguyoso cu el a sali completamente inocente di tur acusacion. Despues di 6 caso den corte, a yega na un final completo na e caso FDNSN. Otmar ta detaya e parti final di e proceso y con a yega na e acuerdo. **Mas o menos 1 luna prome cu a yega na e acuerdo, e fiscal**



cu a trata e caso esta Van der Schaf a aserca e abogado di Henny Eman, el a puntra si por yega na un final di e caso aki cu tur acusado. Nos a bisa cu no ta nos tin caso contra nan, ta nan a apela contra nos, despues cu nos a gana den prome instancia. Nan a tuma contacto cu abogado Chris Lejuez, kende a bisa nan cu ta nan tin cu trek in e caso p'e caba, Fiscal Mos a bay na e oficina di Lejuez y a pidi pa yega na un acuerdo cu nan lo trek in e caso. E motibo di mas grandi tabata cu e caso tabata dañá e imagen di e propio Ministerio Publico, como tambe e bienestar general. Otmar a bisa Chris Lejuez cu e no tin problema si nan kier trek in e caso, pero pa corda ministerio publico cu e ta bin cu un caso di daño di perhuicio. **Ministerio Publico kier a condiciona e acuerdo cu nos no por bin cu un caso di daño di perhuicio. Mos a bin bek y a bisa cu nan no ta sinti e necesidad di bay hoger beroep y nan kier yega na un acuerdo, nan tabata**

willing pa cover e mitar di e gasto di mi abogado, si mi laga e caso cay. E mensahe a bay bek cu nos ta topa den corte, e ora ey nan a bisa cu nan ta willing pa cubri mayoria di gastonan y asina nos por a yega na un acuerdo. E gasto, segun Otmar, acumula atrabez di e añanan y e casonan tabata hopi. Otmar Oduber tabata sigur cu e lo gana apelacion pasobra cu tur e casonan nan no por a proba cu e a bay ni cu 5 cen corda otro sumanan menciona. Mirando cu al final ta placa di pueblo lo mester paga e daño di perhuicio, Otmar a dicidi di accepta e vergoeding pa cera e caso.

Otmar Oduber su conclusion despues di a pasa dor di tur e casonan, despues di a lesa tur documento tabata cu tabatin presion enorme tabata wordo poni politicamente riba ministerio publico. **Esun cu mas a presiona ta e abogado di gobierno Hendrik Croes. Tabatin carta cu ta bisa cu ta danki na su per-**



sona y Rudy Lampe por a bin cu e caso FDNSN. Ora cu bo mira cu ningun di e asusacionnan tabatin base. En total tabatin un combinacion di como 970 acusacion contra mi y ni un e abogado di gobierno, ni ministerio publico no por a proba. Ta djis mala fe tabatin cu e meta di destrui hende politicamente. E hendenan aki ta yama nan mes hende di misa? Pesey nos ta evalua seriamente un caso di daño di perjuicio contra Hendrik Croes y su oficina. Pa loke ta Rudy Lampe, Otmar ta sinti cu e ta un politico nobo cu pensamiento bieu, sigur no un persona cu por yama su mes un hende di Dios, si bo mira su gana di odio y venganza.

Otmar no a preocupa su mes cu e hecho cu e hendenan aki a lastra su number tur e añanan, loke si a caus'e dolor ta mira su famia sufri. **Pa mi mama y tata cu a lantami cu norma y balor hopi halto, e tabata duro. Bo sa cu bo no a haci nada malo, tin ora mi ta sinti cu nan ta sufri pasobra ami a dicidi di drenta e arena politico. E satisfaccion tabata grandi**

si, di por a yama un conferencia di prensa den nan sala di cas y anuncia cu mi a keda liber di tur acusacion. Otmar su tres yiuinan, un di 10, 9 y 6 aña tambe mester a haya splicacion constant di Otmar mes, pakico hende tabata skirbi cos malo di dje den corant. **Mi ta purba lanta mi yuinan cu e mesun principionan cu ami a siña di mi mayornan y esaki no ta sosode sin un persona asina importante banda di mi, manera mi casa Lisette, cu semper a para y kere den mi, mescos cu mi ruman y demas famia.**

Otmar Oduber tabata masha cla den e temporada di su acusacion y recien ainda prome cu a para e caso. El a anuncia cu si emberdad e keda condena di cualkier delito e lo a pidi su retiro di parlamento. **Nunca mi a recurri pa ataca un politico personalmente, mi ta ataca si mi tin prueba of indicacion cu irregularidad a tuma lugar, mi por ta fuerte pero,**

nunca mi ta hinca mama, tata of famia di otro den e ambiente politico.

Como parlamentario, Otmar ta sinti, cu bo mester ta un role model den comunidad y si algun dia mester tin un sentencia riba bo, bo tin cu pidi bo retiro. **Tin dos parlamentario di MEP cu strafkaart, cu un condena, esey ta degeneracion di politica y moral den nos parlamento.** Mas pio Otmar ta haya cu e lidernan ta mas culpabel di tolera esaki, un lider sin principio, ta e ehempel di mas malo cu tin pa nos hobennan y nos comunidad.

Ki posibilidad tin cu e gobernantenan actual lo bay haya e mesun grado di investigacion despues cu nan baha? Otmar ta cla riba esaki. **No, e tipo di cosnan asin'aki mester sosode hamas cu niun otro hende. Si un politico haci malo, laga e paga su condena, pero no bay acusa hende cu bo sa no a haci nada, djis pa kibra nan of pa maldad.**

Con Otmar ta splica e hendenan cu

si a keda condena den e caso FDNSN? **E systema cu gobierno ta funciona tin hopi control. Prome cu bo tuma e decision tin hopi ambtenaar ta controla. Un acusacion di 50 miyon a keda lanta, y esey ta henter e presupuesto di proyecto di FDNSN. Na unda placa a bay? Entre otro na e approach road pa San Nicolas e entrada cu rotonde, a embeyece henter e entrada na un costo di 6 pa 7 miyon, e piscina olymico na Savaneta, e community Pool na San Nicolas, renovacion di Stadion Joe Laveist. Bo ta corda e ruina di Sporthal bou Gobierno di MEP? Ta nos a renob'e na un costo di 3 miyon pa facie Centro Libertador Betico Croes. Nos a realiza proyecto deportivo, cancha y tereno social na Mabon, Esso Heights, Village, verkavelingsplan Weg kustbatterij y de Vuyst, asina mi por sigui menciona y aki ta caminda cu e placa a bai. Mencionami awor e proyectonan cu e gobierno actual a haci pa San Nicolas?**

Loke a sosode ta cu na nivel di contratista y algun ambtenaar lo tabatin cierto manipulacionan a tuma lugar y nan a paga p'e. A probecha di e hecho ey pa purba liga esaki na e Prome Minister, na e Minister di Finanzas y na un consehero di dje.

Otmar ta kere cu pueblo ya no ta cay den e pensamiento di antes. Awendia pueblo ta critico, ta analiza y ta dicidi.

Pa loke ta nos turismo, Otmar kier mira e shift for di mas y mas camber pa mehoracion di nos producto Aruba. **Nos mester consolida y mehora e calidad di e producto Aruba, crea infraestructura cu ta lagabo sinti cu bo ta na un isla di calidad, embes di un little Miami. Sigui cultiva nos 'friendliness', crea institutonan cu ta preserva nos atraccionan turistico, p.e. nos grotnan, nos minanan, nos beachnan y sigui inverti den elevacion di calidad di e producto Aruba. Esey ta e reto pa e proximo gobernacion.** Otmar Oduber ta pensa cu turismo, no mester ta djis pa nos pais tin crecimiento, sino turismo mester t'ey pa mehora e calidad di bida di cada hende cu ta biba na Aruba.

Den tur loke a sosode el a keda corda e dicho cu su wela tabata uza, esta: 'Cu Dios por bisti pijama, pero e no ta drumi'. Cu pasenshi Otmar Oduber ta sinti su mes satisfecho di por sigui den politica, representando e pueblo di Aruba, cu frente na laira. 